

Barúwa ya Yaakúupu Mulongooryo

Muuntú ^aandika barúwa iyi, ni Yaakúupu. Uhu Yaakúupu ni umwi wa vanduu wa Yéesu ajáa (Matáayo 13:55). Yaakúupu uhu, si Yaakúupu muntu wa Yooháni (Matáayo 4:21), au Yaakúupu sha Alufáayo (Matáayo 10:3) tuku. Mpindi ^aandikáa barúwa iyi, yeeye ni mulongooli wa vaantu ^vamura Yéesu uko Yerusaleemu ajáa (Mirimo ya Vatumwi 15:12-13). Paúli amwaanirira “Ngururyo” yo muruma Kirisitu (Vagalatia 2:9). Kati ya myaaka ya 62-69 keende Kirisitu ^avyaalwa, vavi va Kirisitu vajáa vamuula Yaakúupu sa kura kumuruma kwaachwe Yéesu Kirisitu. Na barúwa iyi Yaakúupu iyandika de ulawe.

Barúwa iyi, Yaakúupu avaandikira vaantu ^vamura Yéesu wa Kiyahúudi ^veene vajáa vatiija múuji wa Yerusaleemu, ^vakingirirwe ni Vayahúudi ^veene vajáa vamsiita Yéesu Kirisitu. Ava noo ^vamuula Sitefáano (Mirimo ya Vatumwi 7:54-8:3). Vaantu ^vamura Yéesu avo vajáa viipasa isi joosi ja Yudeea, Samaria, Foinike na Siria (Mirimo ya Vatumwi 8:1; 11:19). Iki noo ^chooreka Yaakúupu avaanirira vaantu ava, “nkolo ikimi na iviri ^ng’ene jeenera weeru yoosi” (1:1).

^Cheene Yaakúupu avawyira ava vaantu aha barúwii, ni kwimirira neeja kura kumuruma

kwaavo Yéesu na kuvawyiira ^vyeene vari ki-ikala mpiindi ja uturikiri (1:2-15). Avakaan'ya vaantu ^vamuruma Yéesu vareke kvasinanala vaantu (2:1-11). Alumirirya kumuruma kwaavo Yéesu koonekane ko tumama masáare maaja (2:14-26). Kei, avalairirya vandoolaanga neeja ndimi jaavo, kari varekere jikorerye mooto si ^urímaa tuku (3:1-12). Kintu chingi ^alumirirya ni kumuruma Yéesu, kavaloombera valwiri na kuvahaka makuta valwiri kwa irina ra Mweenevyoosi (5:13-16).

^Vyeene Kitáabu iki Chagavwa

Lumbi na kuyerwa 1:1-18

Kuteera na kutumama 1:19-27

Kari tundoosinanala vaantu tuku 2:1-13

Kuruma Yéesu koonekanaa kwa nteendo njija 2:14-26

Kwimirira lurimi na tooti ya kurumwii 3:1-18

Kari tave vijeengi na masáare ya weeru tuku 4:1-5:6

Tuyimirirye uturikiri na tandooloomba ko ruma 5:7-20

Lumbi ya Yaakúupu

¹ Yaakúupu, mutúmwá wa Muluungu na wa Mweenevyoosi YéesuKirisitu, lumbi kwa nkolo ikimi na iviri ^ngeene jeenera weeru yoosi.

Tooti na Kumwiilaangya Yéesu

² Ee vanaviitu eryi mitima kati ^mooyerwa kwa njira ^jiisimiresimire.

³ Nyuunyu mwamányire kuyerwa kwa kuruma kwaanyu kwabwéeyaa mundahe kuyimirirya.

4 Kuyimirirya kwaanyu moosaakwa mukukiimikirirye, sa mave vaantu ^vakangaala kei ^vakiimikirira, si ^mookeehekerwa ni kiintu baa kimwi.

5 Maa kaa, kooni umwi waanyu yoosova tooti, amuloombe Mulungu. Yeeye asiina itima tuku na avahéeraa voosi ^viri foo na kei Mulungu si avikaakuuundi mutimii tuku, kumuheera ari.

6 Maa kati yooloomba ni mpaka arume baa kari ave na wiikovereri tuku, sa muuntu ^ari na wiikovereri ni ja ipúunta ra mayiya, rira ^risumwírwe ni mpeho no rutwarutwa kunu na kunu.

7 Muuntu ja uwo, kari iisee turya ari kiintu chochoosi fuma kwa Mweenevyoosi tuku.

8 Yeeye ni ja iwalaanga ari, iikóvererakovereraa kuyeenda kwaachwe koosi.

Ekiva na Usúngaati

9 Haaha mwaanaanyu ura ^ari isi iidumbe na eerye mutima sa Mulungu amwiinula.

10 Viivyo baa musúngaati ne eerye mutima kati ^yookiimiwa na isi, sa looseeka ari ja malava ya isekii.☆

11 Mwaasu watúlaa na ivááva raachwe, ^reene ruúmyaa masaambi. Malava ya masaambi yaláhalaa na kubooha kwaachwe kwarimíraa. Noo jeyyo, musúngaati ne kuma ari ng'ang'ala na mirimo yaachwe ^atámamaa.

Kuyerwa

12 Atalariwe muuntu ^ayímiriryaa mpiindi jo yereniwa, sa kooni asíindire uko kayereniwa,

☆ 1:10 Laanga Yereimía 9:22-23.

heewa ari itáaji ra nkaasu ^reene Muluungu iichuunga kavaheera vara ^vamweenda.

¹³ Kooni muntu yooyerwa kari asee jei tuku, “Nooyerwa ni Muluungu.” Sa Muluungu si ayérwaa ni uvi tuku baa kei yeeye si ayéraa muntu yoyoosi tuku.

¹⁴ Maa kaa, kira muntu ayérwaa kati ^anwéeriire na ^akwáatikire ni uláku waachwe mweeneevyo.

¹⁵ Haaha ura uláku ^uri sumala inda, wavyáalaa uvi na ura uvi ^uri kangaala wavyáalaa wulalo.*

¹⁶ Vanaviitu naveenda. Kari mukóoverwaa tuku.

¹⁷ Kira kiintu ^chabooha na kira kiintu ^chakiimana chafúmaa mweeri, chakiima fuma kwa Muluungu Taáta, yeeye noo Taáta wa vimari vyoosi kurumwii. Yeeye si aválandukavalandukaa tuku, baa kei asiina ivala ro valandukavalanduka tuku.

¹⁸ Kwa muryungu waachwe, yeeye atavyaala kwa isáare raachwe ra kikomi, sa tve vaachwe-vaachwe mbere ya viintu ^avyumba, kei tve ja mpóryo ya viintu ^vichwíirwe vya ncholo.

Kuteerera no Tumama

¹⁹ Vanaviitu naveenda. Kwaatyí isáare iri! Nyuunyu mwaanguhe kundooteerera na kari mwaanguhe kundoolusika tuku, baa kari mwaanguhe kundookalala tuku.

²⁰ Sa kooni muntu akáliire si ari daha tumama uwoloki ^mweene Muluungu asáakaa tuku.

²¹ Sa jeyyo, fweiti na kuli kosu joosi na uvi waanyu woosi, mahokere ko kiiloombererya na isáare rira ^rahaandwa kwaanyu ^reene radáhaa kulamurirya nkaasu yaanyu.

* **1:15** Laanga Varúumi 5:12, 21; 1 Vakorínto 15:56.

22 Maa kaa, mave vatamami va isáare na kari mave vateereri vii tuku, kunu mookoovera mitima yaanyu.

23 Muntu yoyoosi atéereraa isáare baa ritumama tuku, uhu ni ja muntu iilángaa buuwo yaachwe kiwóowii.

24 Muntu uwo ari humula kwiiyona, atámanyaa, na hahara arimiryaa vyeene ari.

25 Maa kaa, muntu iiririkanaa Miiró ya Mulungu yakiimana na yaréetaa uhúuru fuma kwimirirwa ni uvi, uwo iisimire. Kooni muntu uwo atúbire tuuba Miiró bila yoorimiryaa cheene atéire, uwo talariwa ari kwa yara meene atámamaa.

26 Kooni muntu yookiiyona yeeye ni muntu amweéryaa mutima Mulungu na si akítiraa lurimi lwaachwe, muntu uwo ni iikóoveraa vii, díini yaachwe ni kintu kisiina.

27 Díini iri mpeho, isiina kosu irúmwaa mbere ja Mulungu Taáta wiitu noo ihi, kvaambirirya varekwa na valala na uturikiri waavo no kwiiyimirira udiire saambulwa ni uvi wa weeru.

2

Kusinanala Vaantu

1 Vanaviitu mumwiilángyaa Mweenevyoosi wiitu YésuKirisitu, Mweenevyo wa Nkongojima, kari mufákulaa vaantu tuku.

2 Baa ja tasee, kooni ujire muntu na mwiiing-wii waanyu, ari na péete ya saháabu na iirúwikire ingo jabooha, maa kei uje mukiva iisasavire ingo jasakahala, jooli mubwéyyaa?

³ Nyuunyu mumanyémyaa ura muuntú ^iirúwikire ingo ^jabooha na mumuséaa, “Ikala aha haantú ^habooha,” na ura mukiva mumuséaa, “Weewe ima hara,” au “Ikala aha isi ya ibambari ra majeo yaani.”

⁴ Eri, uwo si uri usinanali tuku wuu? Na kei, si uri ulamuli muvi fuma mitimii yaanyu tuku wuu?

⁵ Teereri vanaviitú va mutimii. Eri, Muluungu si avasaawula vakiva va ihi weeru vave vasúngaati vo mwiilaangya Yéesu na vahokere Utemi Muluungu ^iichuunga kuvaheera vara ^vamweenda tuku wuu?

⁶ Maa kaa, nyuunyu moomuchwa mati mukiva. Eri, si avo vasúngaati noo ^vavoóndomereryaa no ^vatwaala na balásii tuku wuu?

⁷ Eri, si avo noo ^vahíntikíraa irina riija rira ^reene mwaheewa tuku wuu?

⁸ Kikomi, kooni mookiimikirirya ura umwi wa Miiro ya kitemi ira ^yasea, “Mweende mwiiwaako ja ^vyeeene wiiyenda mweeneevyo,”☆ tumama mwiise viija.

⁹ Maa kaa, kooni moosinanala vaantu, mataange bweyya mwiise uvi na ira Miiro valamurira yiise nyuunyu mwiiwúnaa.

¹⁰ Sa muuntú yoyoosi ura ^akwáataa Miiro yoosi, maa kaa, akasaambula umwi vii, uwo valwa ari asáambwíire Miiro yoosi.

¹¹ Sa ura ^mweene asea, “Kari uyéendaa na muki wa muuntú tuku,” kei asea, “Kari wuúlaa tuku.”☆ Sa jeyyo kooni si uyéendire na muki wa muuntú, maa kaa, wuúlaire, weewe uwúnire Miiro.

☆ 2:8 Laanga Valáawi 19:18.
Nkambukira ya Miiro 5:17-18.

☆ 2:11 Laanga Ufumo 20:13-14;

12 Sa jeyyo, luusiki no tumama ja vaantu ^muri lamurirwa ni Miirira ira ^ivafúmyaa kuntu ^moondomereriwa.

13 Sa kũheewa irya kusiina mbavariri kwa muntu ura ^asiina mbavariri tũkũ. Maa kaa, mbavariri ya Mũlungũ veera iri mweeri ya kũheewa irya.

Kuruma na Kutumama Mirimo Mijja

14 Ee vanaviitu kunáalo che kwatiite muntu kũsea amuruma Yéesu na kũũ si yoobweeyya viintũ viija? Eri, kuruma ũko ifaanaa kumulamurirye wũũ?

15 Eri, baa ja kooni mwaaniitu au irũmbũ riitu avawa ni usava wa ingo au chákurya,

16 na umwi waanyu kooni amũséire, “Ŭkafika nkaasũ, ũkoota mooto nkaasũ na ũve na mwiikuto mũũja,” baa kũmwaambirirya ingo na chákurya tũkũ, ni kunáalo che ^mwatiite?

17 Noo jeyyo, kumuruma Yéesu baa kũva na mirimo ^itámanyanyaa na kũra kumuruma, ũko kumuruma kwaakwya.

18 Maa kaa, muntu umwi sea ari, “Weewe umwi-iláangyaa Yéesu, na niini natumamaa mirimo mijja.” Haaha hooni ndaira kumwiilaangya kwaako Yéesu baa kũbweeyya viintũ ^vitámanyanyaa tũkũ, naani kulaira ndiri kumwiilaangya kwaani kwa mirimo yaani.

19 Uruma kwatiite Mũlungũ umwi vii. Vya-booha! Baa mirimũ mivi yarúmaa na yatétemaa ni woowa.

20 Eri, weewe muntu muhoho, saaka wiise ulairwe kuruma kũra si ^kutámanyanyaa na mirimo si kiintũ tũkũ wũũ?

21 Eri, baaba wiitü Aburaháamu si avalwa ni mawoloki sa kira ^atumama ^akamutoole mwaana waachwe Isaka ave mpóryo masabáahwii tükü wüü?

22 Kooni wiise wüü? Kuruma kwa Aburaháamu kwatamanyan'yáa na mirimo yaachwe na ^vyeene kuruma kwaachwe kwakiimikiririwa ni mirimo ^myeene atumamáa.

23 Jeyyo, yakiimikiririwa Masáare ^Yari Mpeho yara ^yasea, "Aburaháamu akamuruma Muluungu, sa jeyyo, Muluungu akamvala Aburaháamu ni mawoloki,"☆ ne aanirirwa kijeengi cha Muluungu.

24 Mwiine wüü? Muntu aválwaa ni mawoloki kwa mirimo yaachwe na si ko muruma Muluungu kookweene vii tükü.

25 Noo jeyyo, baa Raháabu muhéngéeti, si avalwa ni mawoloki sa viintü avahokera vara vuurikiriri akavaambira vatweere na njira yingi tükü wüü?☆

26 Ja viintü ^viri, kooni maviri usiina nkeeho, uwo waakwa, noo ^vyeene viri kwa muntu ^amurúmaa Muluungu baa kubweeyya mirimo ^itamanyan'yaa na kuruma kwaachwe tükü.

3

Lurimi

1 Vanaviitü, kati yaanyu kari kundoova na vaki-indya va isáare ra Muluungu ^vari foo tükü, sa mamányire siku ya ulamu Muluungu lo tulamirira ari suusu vyahuumba kulookya viingi.

2 Suusu voosi tahón'yaa kwa njira ^jiri foo ^jiisimiresimire. Kooni amwaari muntu si

☆ 2:23 Laanga Ncholo 15:6.

☆ 2:25 Laanga Yooshúa 2:1-24;

6:22-25.

^ahón'yaa kwa yara ^alúusaa, uwo ni wa kikomi na adáhaa kwíimírira máviri waachwe woosi.

³ Tavíkíraa vipíini milomwii ya faráasi sa jindootuteera, kwa njira ijo tajilongoola míviri yaavo yoosi vuu.

⁴ Viivyo baa méeli, baa neembe ni nkúúlu munumunú na yakúndulwaa ni mpeho ^yahúumba, yalóngoolwaa ni usukáani muduudi na yadómaa na kúuntu kokoosi ^kweene mulongooli asáakaa idome.

⁵ Viivyo baa lurimi ni kúuntu kiduudi vii muvirii, maa kaa, chíineengaa munumunú vii. Iririkane ^vyeene kotoo kaduudi kadáhaa mala isaka ra loovíwo.

⁶ Lurimi nolo ni mooto! Kati ya viintu vyoosi ^viri muvirii, lurimi noo weeru ya mavi. Lwamasáambulaa muuntu vuu na lwakóreryaa mooto kúri nkaasu yaachwe yoosi. Na loolo lwakóreriwaa mooto wa Jehénamu.

⁷ Vaantu vadáhaa temerera maka ja isekii na ja kaayii ja kira ivala, ndee ja kira ivala, viintu ^vitámbaalaa vya kira ivala na viintu vyoosi vya mayiyii, na vawaayya kuvitemerera vyoosi.

⁸ Maa kaa, kusiina muuntu ^adáhaa temerera lurimi lúdiire lúusa úvi tuku. Lurimi ni úvi si ^utúulaa. Kei lwamema kinyéruumbe ^chúulaa vaantu.

⁹ Kwa lurimi tamúúmbaa Ijáva Taáta wiitu. Na kei kwa lúulo lurimi, twajúmíraa vaantu. Avo vaantu vuumbwa ni Múlungu kwa buuwo yaachwe.☆

¹⁰ Múlomwii úmwi, múmo tadúmbaa na tajúmaa. Vanaviitu, vyavíha kúva jeyyo!

☆ 3:9 Laanga Ncholo 1:27.

¹¹ Eri, nchóonko imwi ifaanaa ikafumya maaji ^yari mwerere na ^yari usungu wuu?

¹² Vanaviitu, musaambu watungaa saitúuni wuu? Au musabíbu watungaa saambu wuu? Noo viivyo, nchóonko imwi si iri daha fumya maaji ^yari mwerere na ^yari sangása tuku.

Tooti Ifúmaa Kurumwii

¹³ Ni ani umwi waanyu ^ari na tooti na miryungu? Uwo oonekye ayo kwa njira ya mwiikalo waachwe muja na kwa mirimo yaachwe ^myeene atámamaa ko kiiheembererya na kwa tooti.

¹⁴ Maa kaa, kooni mitima yaanyu yamema kivina ^kiri na usungu na kuviihya inda, kari mwiivaa kipeembe tuku na kari melúsaa uloongo haantu ha kimáári tuku.

¹⁵ Tooti ^iri jeyyo, si ifúmaa kurumwii tuku ni kari weeru ifúmaa, si ya mutimii tuku na ni ya Irimu reeneevyo.

¹⁶ Sa kira haantu ^hari na kivina na muuntu kwiilaanga yeemweene vii, aho, hatiite isóso na kira ivala ra uvi.

¹⁷ Maa kaa, tooti ^ifúmaa kurumwii ni uteréere iri, yeenda mwiikalo muja, yahola na yaviiririkanaa vaantu vingi, yalángaa na riiso ra wuuja na yatiite ndiwa njija. Si isinanalaa vaantu tuku, na isiina ulááhi tuku.

¹⁸ Vaantu va mwiikalo muja mpiindi ^voohaanda mwiikalo muja ja mbeyu, vujaa joochwa uwoloki mbere ya Mweenevyoosi.

4

Kwiivika Isi ya Mulungu

¹ Nkoondo na wiitóoli ni hai ^vyoofuma kari nyu-
 unyu? Eri, si vyoofuma ulákwii ^woolwa nkoondo
 na miviri yaanyu tuku wuu?

² Moomerirya mati viintu na si moovipata tuku,
 jeyyo moosaaka muulae. Moova na kivina maa
 kaa, si mari pata vira ^moosaaka tuku. Jeyyo,
 mookiitoola na moolwa nkoondo. Musóvire sa si
 moomuloomba Muluungu tuku.

³ Mpindi ^mooloomba si moopata tuku sa viintu
 ^vyoobweeyya muloombe, ni vivi. Mooloomba sa
 mukiimikirirye uláku waanyu.

⁴ Nyuunyu ^mayéendaa na vaki na valume va
 vaantu, si mamányire kuva kijeengi na weeru ni
 kuva muvi na Muluungu tuku wuu? Sa jeyyo,
 muuntu ura ^yoosaaka kuva kijeengi cha weeru
 uwo arúmire kuva muvi wa Muluungu.

⁵ Kari mwiiséaa Masáare ^Yari Mpeho yalusa
 masáare aya ubweete tuku, “Mutima Muluungu
 ^aviika kari suusu, watweenda maatuku vii.”

⁶ Kikomi woowo, watoóngereryaa nduwo. Noo
 ^chooreka Masáare ^Yari Mpeho yalusa,
 “Muluungu avakítiraa vara ^viivaa kipeembe,
 maa kaa, avahéeraa nduwo vara ^viikímyaa na
 isi.”☆

⁷ Haaha reeru, iviiki isi ya Muluungu. Ikúulu ra
 Mirimu Mivi risiiti noro vatija riri.

⁸ Museesereri Muluungu ne vaseeserera ari.
 Nyuunyu vavi! Reki tamama uvi. Kei jiruli mitima
 yaanyu nyuunyu ^mari kosikosi.☆

☆ 4:6 Laanga Mpíri 3:34; 1 Peéteru 5:5. ☆ 4:8 Laanga Sabúuri
 24:3-4.

⁹ Oni usungu, riri na riri no myaaha. Luseko lwaanyu lvalanduke lwe kiro. Na kweerya mitima kwaanyu kwe koonu usungusungu.

¹⁰ Kiimi na isi kwa Ijva, ne viinula ari.

Kwiilongowererya

¹¹ Ee vanaviitu, kari mwiilóngowereryaa tuku. Muntu amulóngowereryaa mwiiwaachwe vyaviha au amulámuriraa, uwo alúusa Miiro ni mivi na iisínanalaa. Kati wookilamurira Miiro, na weewe si wiitúubaa tuku, wavijaa wookilamurira.

¹² Ni Mulungu vii noo avíkaa Miiro na noo Mulamuli. Ni yeeye vii noo adáhaa kalamurirya na kumala. Ha de haaha weewe uri ani furu amulamurire mukaaya waako?

Kwiivaa Kipeembe sa Masáare Yookujja

¹³ Haaha nteereri nyuunyu múséaa, “Isiku au lomútoondo doma turi na mújii umwi. Kwikala turi uko mwaaka vuu toochurusha no turya kisapu.”

¹⁴ Maa kaa, si mumányire cheene kiri fúmira lomútoondo tuku! Nkaasu yaanyu ni ya mpiindi nduudi vii. Nyuunyu ni ja muve, woónekanaa kwa mpiindi kiduudi na kiduudi warímiraa.

¹⁵ Kiri vyoolúusa jeyyo, vyasaakwa mandoosea, “Kooni Mweenevyoosi avyeéndire, kwiikala turi na bweyya turi iri na rira.”

¹⁶ Maa kaa, nyuunyu si mabwéeyya jeyyo tuku, nyuunyu mwiivaa kipeembe no kiyyona. Kwiivaa kipeembe koosi uko kwaviha.

¹⁷ Muntu yoyoosi ura amányire isáare riija ro bweyya na akareka kuritamama, muntu uwo abwéeyya uvi.

5

Kukaaniwa kwa Vasúngaati

¹ Haaha, teeri nyuunyu vasúngaati! Riri na ani ntáákwi, sa mäsengeriire kúngira uturikirii wa kikomi.

² Usúngaati waanyu woórire, na ingo jaanyu jabóntwíirwebontwíirwe ni nchíli.

³ Saháabu na mpía jaanyu, jakwáatirwe ni kúutu. Kúutu iyo, kuvatwaala iri na kiloongii, na kurya iri miviri yaanyu ja mooto. Nyuunyu makúngwíire máari siku iji jo herererya.

⁴ Laangi! Vatamami vaanyu voong'uula! Voovo varima na vaachwa mawunda yaanyu na kwa ukwaata si mwavariha tuku. Kung'uula kwaavo Ijwa Mweenengururu akutéire.

⁵ Mwiibóheriirye aha weerwii kwa máari ^jiri foo na uláku ^uri foo. Mulungu aséngerire kavalamurira. Haaha mavíire ja ng'oombe ^jinénehire so siinjwa.

⁶ Nyuunyu mulúusire irya na mavuúlaire vaantu vawoloki, novo si vavasiitira tuku.

Kuyimirirya Uturikiri

⁷ Sa jeyyo, vanaviitu yimiriryi fúuru siku ^ari kuuja Yéesu Mweenevyoosi. Laangi ^vyee ne murimi awóojeraa iwunda ritoole ndíwa ja kikomi ^jakangaala. Ayímiriryaa mbula ja mbere ya mwaaka na jo kiimikirirya mwaaka. ⁸ Baa nyuunyu moosaakwa mündooyimirirya na mitima yaanyu yiime neeja, sa kuuja kwa Yéesu Mweenevyoosi kwaséngerire.

⁹ Vanaviitũ kari mwiing'ũurĩraa nyuunyu kwa nyuunyu tukũ sa mudiire lamurirwa ni Mũlungu. Laangi, Mũlamuli iĩmire mbere ya maryaango.

¹⁰ Vanaviitũ valaangi valáali na matwe vara ^valuusikáa kwa irina ra Ijũva ^vyeene vayimiriryáa uturikiri. Nyuunyu vatuubiriryi avo.

¹¹ Nyuunyu mwamányire, vara ^vayĩmiriryaa tavaválaa vatalariwa. Mwateera uyimiriryi wa Ayũubu na mwateera kira ^cheene Ijũva amatũmamira sikũ jo herererya. Ijũva atiite mbavariri na wũũja mukũũũ.✧

¹² Ee vanaviitũ kulookya vyoosi, kari mwiiláhaa baa kwa kurumu au kwa weerũ au kwa kũntũ chiĩngĩ chochoosi tukũ. Kooni mũséire, “Hĩĩ” ive “Hĩĩ” na kooni mũséire, “Tũkũ” ive “Tũkũ.” Kooni si moobweyya jeyyo heewa mũri irya.✧

Kũloomba ko Ruma

¹³ Eri, kwatiite umwi waanyu ^yooturikira wũũ? Ũwo yoosaakwa amũloombe Mũlungu. Eri, amwaari umwi waanyu ^ari na cheerũ wũũ? Ũwo yoosaakwa iĩmbe nyĩmbo jo dũũmba.

¹⁴ Eri, amwaari umwi waanyu ^alwĩre wũũ? Ũwo yoosaakwa avaanĩre vawosi va mpuka ya vaantũ ^vamuruma Yéesu sa vamũloombere na vamũhake makuta kwa irina ra Yéesu Mweenevyoosi.

¹⁵ Na kati ^voomũloombera ko ruma, hola ari. Mweenevyoosi mwiinũla ari na kira uvi ^abweyya, Mweenevyoosi sea ari wasĩre.

¹⁶ Sa jeyyo, mũndookiiwyĩra uvi waanyu nyuunyu kwa nyuunyu na mũndookiiloombera

✧ 5:11 Laanga Ayũubu 42:10-13. ✧ 5:12 Laanga Matáayo 5:33-37.

sa Mweenevyoosi avahorye ulwíri waanyu. Kuloomba kwa muntu mawoloki mbere ya Mulungu kwatite ngururu nkulu na kwatímamaa.

¹⁷ Muláli na matwe Elía ni muntu ja suusu ajáa. Yeeye ajáa aloomba kwa matima woosi mbula idiire vaa na kikomi, mbula si yavaa isi iyo kwa myaaka itatu na myeeri musasatu tuku!☆

¹⁸ Maa kei akujoomuloomba Mulungu mbula ivae, mbula ikavaa na isi ikatoola ndiwa jaachwe kei.☆

¹⁹ Vanaviitu umwi waanyu kooni arekire kimári na muntu wiingi kooni amuhindwire,

²⁰ taangi, uwo yoomuhindula muntu mavi fuma urimirii waachwe, kuva iise ahoniirye nkaasu ya mwiiwaachwe fuma inkwyii na avi uri foo kuva uri waséyyiwe.

☆ 5:17 Laanga 1 Vatemí 17:1. ☆ 5:18 Laanga 1 Vatemí 18:42-45.

Rangi **Rangi Translation Project (New Testament)**

copyright © 2023 Wycliffe Bible Translators, Inc.

Language: Rangi

Contributor: Wycliffe USA

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-05-08

PDF generated using Haiola and XeLaTeX on 7 May 2025 from source files dated 8 May 2025

f1dc5da6-bc39-5ea5-ac13-942132b5feb6